

Hello again!

So, nach es paar wuchae han ich mol wieder luscht zum eu chli z vozellae was do z Indiae so abgoht... ich han mich zimli iiglebt, erkennbar under anderem dra dass ich usaegfundae han wo s M&Ms git (leider nu in miniportionae), und dass ich au miin erstae groessere usflug hinder mir han... und au susch sind no es paar spannendi sachae passiert, we z b tibetischs neujoahr z fiere oder anae indischi hochziit z goh... well da mit viel bildli und bitzli text dezue glaub ganz guet aacho isch, mach ich grad i dem stiil wiiter... vill spass bim lesae und vor allem luegae!

Losar (neujoahr noch em tibetischae kalender)

Isch cool gsi, ich han faeng ei wuchae schuel geh gha, und denn isch scho die erst feriaewuchae gsi ;-) d tibeter fiired neu johr nid nu ein obed lang, sondern grad drue taeg, und well s vill feins z aessae git und s nochher e rechti sauerei isch (wachsleckae ueberall und so) bruchts no chli vorbereitigs- und ufruumziit...

Aagfangae haet s miteme zmorgae, wo au d mary und d tricia und de stephen, d familie wo grad am eggae vo de schuel en kiosk/telefonservice/plaudereggae/ladae-fuer-alles haet, iigladae gsi isch...



De tag durae haemmer nid so vill gmacht, chli spieli gspillt (siehe freiziit part II am schluss), und d chuchicrew haet de znacht vorbereitet... am obed haends mich bete es paar spieli z organisiere, und well i no chli schoggi debii

gha han han ich noch oepae 15 johr mol wieder es schoggispieli gmacht, und si haends glaub recht lustig gfundae:



Nochher haemmer den wiitergspisae, und s haet au chli alkohol dezuegeh... und well d helfti vo de schueler mol moench gsi sind und susch do a de schuel kei alkohol trunkae wird haends nid alli gliich guet votreit resp sind am noegsctae tag nid alli gliich fit gsi... mir haend uebrigens au chli disco gmacht, und sind zu ganz billigster technomusig (und zwuesched innae chli russaedisko vom dj cheese) chli im innaehof umaehuepft... da isch am aafang ganz luschtig gsi (under anderem well es paar indischi chind wo grad uf de stross ussae a de schuel gspillt haend au mittanzed haend), aber mit ere ma-frau-quota vo 10:1 haet sich de spassfaktor halt scho chli in grenzae ghaltae... drum haemmer denn halt chli ueber gott und d welt diskutiert...



Naja, aber eifach 3 taeg i de schuel umaezhaengae waer denn doch chli langwiilig gsi, drum haet s mol no en uusflug in park z bangalore geh...
Doet han ich denn s erscht mol koched, wobii koched zimli uebertribae isch,
aber ich han es paar sachae poschted und es dekadents schlabertoast-mayo-chaes-etc-picnic organisiert...




...und de schueler haet s glaub gschmeckt:



Noch dem vilae spielae und essaet haend di eintae daenn chli erholtig brucht:



I dem park haet s no en steialtae und superdickae baum gha, und de haet denn grad fuer es gruppefoeteli moesae anaehhebae. Leider sind nid alli schueler druf, well e paar sind i dere wuchae go kollege imene chloster bsuechae...



1. usflug

Ich han denk ich mues di glegeheit vonere wuchae ferie au chli nutzae, und well ich zimli luscht uf chli badae im meer gha han bini am dunschtig znacht mit eme voll komfortablae sleeper-bus (nid mit sitz, sondern wuerkli mit better!) a d ostkuestae gfahrae... zersch bini en tag z pondicherry gsi, da isch e ehemoligi franzoesisch kolonie, und ich bin in gnuss vo feinstae croissants und pains au chocolat cho (fasch so we z shanghai, meli). Und es paar frauue

am nebedtisch haend wuerkli franzoesisch gredt... und gwuessi luet haend
mich mit "bonjour" begruesst...

Ich han denn es velo gmietet und welae an 10km noerdlich liegende strand
fahrae, und ufzmol isch oepis passiert wo n ich gar nuem gwuesst han dass
es da git: es haet aafangae raegnae! Di erstae paar tropfae hani ignoriert,
aber irgendwenn hani denkt villicht isch da doch kan scherz, und han mich in
deckig begeh...



Und ich bi nid de einzig gsi, dem nettae rikschafahrer do nebed mir isch s au
so gangae...



Ich han s denn doch no an strand gschafft, und au wenn s grad immer nonid
so sunnig gsi isch hani doch schnell moesae is meer huepfae...



Am noegshtae morgae bini denn wiiter ines kaff namens mammalapuram (villicht hani es 'm' oder es 'a' z vill drin...). s waetter isch denn wieder tiptop gsi, und s backpackers haet fuer 6 stutz pro nacht sogar no es swimmingpool gha und en guru wo z mitzt im innaehof mit sinae aahaenger meditiert haet... Ich han doet au no es paar luet vo europa troffae, und da haet au no guet tue, mol wieder chli mit so luet z quatschae und es bier z trinkae...

Demo

Noch gnau 4 taeg schuel isch denn scho wieder de noegscht speziell event gsi: am 10.3. isch tibetan uprisal memorial day gsi, und mir (de rinzin, es paar schueler und ich) sind a d demovorastaltig z bangalore gangae... doet isch en brief vom dalai lama vorglesae wordae, und nochher haet en inder ueber d parallele vom dalai lama und em mahatma gandhi gschaetzt, und da waer sehr spannend gsi, aber siin indischae akzent haet s nid ganz eifach gmacht...



Es paar maedels vonere andere tibetischae schuel haend denn no recht gas geh mit sprechgsaeng und so und sind denn au prompt am noegsctae tag i de ziitig gsi...



Do no es wiiters grappaefoeteli vo minae schueler (rechts obae isch de rinzin, uesen manager):



The Wedding

Ui, krass, han glaub scho raecht vill gschribae, moeged er no? S chunnt aber glaub nuem so vill...

Wie au immer, en kolleg wo mit mir studiert haet isch inder, und er haet mir vor minere abreis d nummere vonere kollegin vo ihm z bangalore geh (thanks a lot, vijay!), und we s de zuefall so haet welae haet si grad luscht gha zum huerotae... si het denn gfundae ich soelli doch au a da hochziit cho, ooper meh oder weniger spieli kei rollae... und wemae uf dem bild chan erahnae chunnt s bi oepae 300 gaest wuerkli nid drufaa...



Ich bi natuerli de einzig typ mit blondae hoor gsi, und woni cho bin haend d
luet gseit ich soell doch chli vuerae damit ich s besser gsechi... isch cool, d
inder sind wuerkli alli sehr naett und gsproechig (und sehr farbig aagleit ;-)...



Da hochziit do isch "nu" 2 taeg gangae (s chan bis zu 5 taeg sii!!!), und a dem eintae tag wo ich debii gsi bin haet d bruit 3 voschiedeni kleider treit... s haet es paar spannendi ritual geh, z b i dem bild obae haet de priester (rechts) oepae e halb stund em braeutigam oepis diktiert, de haet s moesae wiederholae, und d bruit haet zimli glangwiiled umaenandglueged...

Au nochher sind s ehepaar ehner di armae gsi, am obed haend s 3 stund moesae uf de buehni stoh, und alli 300+ vowandtae und bekanntae sind vobii cho go d hand schuetlae und glueckwuenschae und foeteli machae...



Ganz cool isch gsi dass ufzmol e netti inderin zu mir cho isch und gseit haet "you must be marcel"... si haet sich als d schwoester vom vijay usaegstellt und mir alli ritual erklaert und au susch en huufae ueber indie vozellt...



Miis Zimmer und mini mitbewohner

Es paar luet haend noch em 1. wetterbricht gfroget oeb ich mit dene 3 studis ufem foeteli es zimmer teili, aber nei, da isch nid so, ich han miis eige zimmer, und s isch edelst gross, und ich han sogar mis eige badzimmer, und ersch no mit sitzklo (wohl s einzig do im umkreis vo es paar 100 meter)...

Leider isch s chli dunkel, well s vor oepae 2 johr grad vor miim einzigae fenster es neus huus bauae hend...



Und jetzt zu minae mitbewohner, ganz aeleigae bini naemli doch nid:





Leider hani mi bis jetz nonid choenae entscheide welaes das de oli und
welaes das de ruhli isch...

Freiziit Part II

So, nu no ganz schnell, es paar freiziitbeschaeftigungae do:

1. di indisch variantae vo billiard:



2. d meli-version vo carcassonne findet au in indie aaklang:



3. vorgeschter obed haend 2 studis de drucker usaenandgno, und nochher kan plan meh gha we me me de jetz wieder choent zaemaesetzae... de karma, de rinzin und ich haend denn uesi puzzlefertigkeitae under bewiis doerfae stellae... (man beachte uebrigens den schoenen sonnenuntergang im hintergrund...)



Zum Schluss...

...no es chliises raetsel: da foeteli isch d wc-tuere im 5. stock vomene edlae shopping center in bangalore. Was denked er stohht uf de tuere vo de frauue? (loesung in der naechsten ausgabe)



Ui, sorry, isch chli lang wordae die sach... ich hoff ihr haends trotzdem es bitzeli spannend gfundae, und wuer mi freuae oepis vo eu z ghoere...

Liebi gruess us whitefield, bangalore, karnataka state, india
Marcel / chesi / cheese